



في هذا الملف جمعنا لكم تجارب الطلاب  
في جامعة الملك سعود بن عبدالعزيز للعلوم الصحية (الحرس)

عام ٢٠١٨ - ٢٠١٩

وخصوصاً في الانجليزي من ناحية الدراسة ونصائحهم لكم

هذا تعريف مبسط للمواد عشان تاخذون فكرة:

### **(English 101 – Writing and Oral Skills)**

في هذه المادة راح يدرسونكم ثنتين، وحدة راح تدرسكم جزئية الرايتنق (الكتابة) ووحدة راح تدرسكم جزئية الاورال سكلز (هالمادة عبارة عن مهارتين اللي هي السبيكنق (التحدث) ومهارة اللسنق (الاستماع)) الكويزات منفصلة عن بعض ولكن لهم ميد واحد وفاينال واحد.

### **(English 102 – Grammar)**

اللي هي مادة القواعد الانجليزية، راح تاخذون ازمنة مختلفة وتدريبون عليها

### **(English 103 – Reading & Vocabulary)**

هذه مادة القراءة والمصطلحات، راح تاخذون قائمة مصطلحات ( vocabulary

list) لكل تشابتر تتعلمون بعض كلمات ومرادفاتها. واختباراتها تتضمن مهارة

التفكير الناقد (critical thinking)، وقطعة واسئلة متعلقة بها.





أهلاً للباتش الجديد.. حياكم الله بجامعتنا، فيها من الألفة والحنية أكثر مما تتوقعون، الناس فيها لطيفين جداً

اسمي أريج الشمري، مستوأي في اللغة الإنجليزية أول مادخلت كان جيد، مستوأي بالثانوي عموماً كان ممتاز، كنت أجيب بكل المواد 100 فكننت مجتهدة أما بالإنجليزي كنت جيدة-هذا اللي أعتقدته قبل ما أدخل الحرس- بعدها أكتشفت أن مستوأي أقل مما كنت أظن بحكي لكم الأشياء اللي لو أني تجنبتها كنت أخذت درجات أعلى..ولازم تعرفون أنه مافيه شي سهل، ومافيه شي مستحيل، مقدور عليها يعني بالإجتهد.

أولاً، الترم الأول وأول الأسابيع ماواجهت مشاكل أبد لا من ناحية صداقة ولا فهم، كنت متحمسة لأول إختبار قصير(كويز) لأنه بيكون الأول بحياتي الجامعية وسمحت لنفسي النقص وقلت خذيه تجربة لاترعلين من نفسك يانفسي

1-وهو كويز أول مادة أحب أكلمكم عنها لأنني متأكدة بتقرؤون بالتجارب كثير تحلطم بهالمادة وهي مادة القراءة ( الريدنق)

نقصت ٤ درجات في أول كويز وزعلت - بحكم أني كنت توني جاية من ثانوي وكننت مازلت أستصعب موضوع الفصل بين الثانوي وحالياً-

وهذا أول خطأ لازم تتجنبونه

أول مايتم قبولك بالجامعة أنسي الثانوي وطريقة المذاكرة والدرجات، المقارنة بتتعبك خصوصاً للي مثلي كنت متعودة أني أكون الأولى

اللي حصل أني قدرت أطور وأقل من هالنقص لكن صدمتني درجة الميد

طبعاً هالمادة جزء كبير منها خارجي (قطعة أو قطعتين تكون خارجية + تفكير ناقد (critical thinking))

بالميد الأول 7 أخطاء على الجزء الخارجي، الميد الثاني جزئية التفكير الناقد ولا خطأ- كنت فخورة جداً وطايرة من الفرحة- ونقصت بالقطعة 5

لكن بنهاية المطاف ماقدرت أخذ المعدل اللي اتمناه لأن مجموع النقص بالكويزات مع الميد كبير نصائحي لهذه المادة: في وقت الإختبار، ثقي بنفسك! لاتغيرين إجاباتك-لأنها مو قانون ومتأكدة من الصح مثلاً-

لاتعطين أي سؤال وقت أطول من اللازم، لأن تذكرني! سؤال خطأ أهون من 20 خطأ، غير أنه أصلاً يمديك ترجعين له بعدين

تعودي على الإجابة بسرعة قبل دخولك للإختبار-بينزل لكم تدريبات وأشياء كثيرة مرة-

وأخيراً، لاتقسين على نفسك؛ لأن هالمادة جزء كبير منها يعتمد على الخلفية الثقافية باللغة الإنجليزية.

2- مادة الكتابة(الرايتنق) هي اللي واجهت مشاكل كثيرة معها وتمنيت جداً أني تدخلت أسرع- لأنني صلحت المشكلة متأخر بعد ما طارت الدرجات- وهي أكثر مادة سببت لي إكتئاب لأنني أنظلمت فيها-بكل الترمين-

مشكلتها تكمن في أنها تعتمد بدرجة كبيرة على المعلمة حيث أنها هي المصححة، وهي كذلك المادة الوحيدة التي تحتاج منك فهم للمعلمة وأسلوبها، يعني تدرسين المعلمة دراسة وإذا قالت هذا ما عجبني شيليه، شيليه وحطي اللي تبي المهم رضاها الأميرة  
والمشكلة الثانية أنها في الترم الأول-فقط-مشتركة مع مادة الإستماع، درجاتهم واختبارهم مع بعض وأسم المادة أصلاً (الكتابة والإستماع)

وأنا كان عندي مشكلة بالسماع والصراحة أشك أني صقها-صمّاء في رواية أخرى- أمزح طبعاً بس المقصد أني كنت أواجه مشكلة عويصة، مالسبب يأتري؟ السبب أن الصوت يُعاد مرتين فقط وأنا ما ألحق ألقط إجابات- طبعاً بالثانوي ياسلام واضح الصوت وواضحة اللكنة والسؤال مباشر لكن بالجامعة كل هذا تلاشي- أذكر في الميد الثاني طلعت وأنا مبسوطه لأنني وأخيراً قدرت أسمعته لا ومو أي سؤال! سؤال أرقام يعني سمعته وهو يقول رقم! ولقطت الإجابة بعد! أوف ياسلام، لسان حالي كان يقول "الليلة يمكن تقولي يانفسي أنك سعيدة" ويوم طلعت أراجع مع البنات قالوا أنه كان يتطلب حساب-يعني السؤال كان يبي مجموع حاجة وهو قال رقم ثم بنص الكلام قال رقم ثاني فالمفروض تجمعين- وقلت في قرارة نفسي "ياليتنا من حجنا سالمين"

عموماً تطورت فيه لأنني صرت أسمع كثير وأتابع قلوبات يوتوب و صار النقص قليل مرة والسبب يأتري؟ وثقت بنفسي ونظفت أذني وصرت قبل لا يبدأ الصوت اقرأ السؤال وأحذف الإجابات غير المنطقية حتى قبل سماع الصوت

وبالنسبة لمادة الكتابة أستعنت بأستاذة تصحح لي كتابتي-بعد أن أرسلت لها كامل شروط الكتابة وهي تتواصل معاي على الواتس، أنا أكتب وهي تصحح الأغلاط وتعدّل الأخطاء والقواعد وما إلى ذلك- وكمان صرت أخذ أفكار من النت، وأرتفعت درجاتي لكن بعد ما طارت اللي قبل لذلك أختصروا الطريق ومن البداية ووفرّوا لكم استاذة، بالنسبة لإختبار الكتابة نفسه، كان مرة سهل فكنت أنقص في جزء السماع لكن الكتابة ما أنقص لأنه سهل

3- مادة القواعد(القرامر) محبوبتي، لأنها تعتمد على جهدك بشكل كبير ومرة ماينخاف منها أبداً وهي اللي كانت تططب عليّ، لكن تحولت من محبوبة إلى عدوة بالترم الثاني، والسبب مو هي، أنا

الآن راح أتكلم عن الترم الثاني  
أغلاطي الحقيقية ظهرت هنا، تعرفون المثل اللي يقول "من جرف لحديرة؟" أيوة بالضبط هذا اللي صار،  
تحدرت

اللي صار إنني كنت قامطة من العلمي لذلك أهملت الإنجليزي مرة وهو بدورة أرتفع مستواه مرة كذلك مستوى مادة القراءة(الريدينق) جداً مرتفع على جميع الأصعدة  
ومادة القواعد(القرامر) خذلنتي، السبب أنها على أساس لعبتي من الترم الأول ف أهملتها وبالنهاية نقصت فيها نقص شنيع ونزل من معدلي واجد

أنتبهوا أنتبهوا، وازنوا وازنوا وازنوا  
الكيمياء ممتع وسهل ونظام بلوكات(اللي تختبرينه بالميد ماتختبرينه بالميد اللي بعده ولا الفاينل)  
الفيزياء يلفون بالأسئلة لكن مرة مقدور عليه إذا تدربتني على الحل



السلام عليكم ورحمة الله وبركاته، انا سارة راشد

بقولكم التفاصيل اتمنى تتمعنون بكلامي

للي ضعيفين لغه ، للي ياخذون بالثانوي ٩٠ و اقل بالانقليزي وهذا بدف بعد، للي مزلبين فيه الحرس يقدسون الانقليزي انا دخلت وكنت اعرف ان انقليزي كله بس ماستوعبت هالمستوى مابغى اخوفكم لكن بعطيكم الجد الجد والله دخلت وكنت واثقه من نفسي جداً لان بعد ماشفت مستواي ثانوي وقدرات وتحصيلي مكسره الدنيا قلت مب صعبه علي بشد حيلي بوقتها ، لكن الانقليزي مافي وقت الانقليزي تطوير لغه مب بيوم تذاكرين وبكرا تفلحين لا يبيلها تطوير يبيلها لغه يبيلها جد جد...

دخلت الحرس وانا بعض الاحيان الخبط بين ال yes وله yas هذا اقرب مثال لضعفي فيه...

دخلنا اول اسبوع ودخلنا اول كويز جبت فيه ٨ من عشرين... انصدمت لكن ماياست برضو جدتت جدتت برضو ماحصلت بالكويز الثاني والثالث قرمر خذت ٢ وكل شوي انصدم واتحطم اكثر واكثر واكثر وانكسر اكثر واكثر وكل يوم ابكي واصيح دون جدوى لدرجة ماصار يهمني هلاص معاد يفيد مذاكره، والمستوى عالي واللي حولي يجيبون وانا زي الخبله بينهم، غلطت عمر غلطت عمر ماستغلطت ال ٤ شهور ولاشفت نفسي ولا ناظرت لنفسي ندمت قد شعر راسي...

كل يوم انصدم وكل يوم انهبل والميد جبت فيه ١٨ من ٦٠ او ٦٥ مااعرف ، كان الريديتق عقدتي جداً لان كان كله لغه مافيه اي جد كثر اللغه، يمديك تشوفين الفوكاب وتحفظينه لكن بالاختبار وفريه بجيبك حفظك اذا مافهمتي السننتز والباقي بسج وافكسز عقدتي العقوده انهزت منه كنت اجيب ٠ بجداره فيه يمين يسار ماينفع ، كلمت العماده يغيرون الطريقه وغيرها وسهلت اكثر لان كان يسوونها بكس وفيه الافكسز وتحطين الكلمات لكن يوم غيروه حطوه اختياري وصار اسهل بكثير وصرت اجيب الفل مارك بجداره.. القمرم بدتت اذاكر يمين يسار وفلحت فيه شوي شوي شوي عشانه براكس اكثر من لغه ، رايتتق للامانه جلدني جلد بالاسايمنت انهار منه لكن شفت يمين يسار مساعده وكنت اكتب بمساعده لين نهاية الترم ونجوت منه الرايتتق كتابه بشكل رهيب ودقه..

على العموم عرب كان تافه بنسبه لي وكنت اجيب الاي بلص بجداره، الباقي نجحت على الحفه والحمدلله ، لكن لكن لكن.. رسبت بالريديتق لانه ماقدرت انجو منه ابداً...

كان عقدتي انهبلت منه صحت بكيت لان ماكان يفيد اي شيء فيني لان ماكان عندي لغه وكان ضغط مايمدي اطوره ولايمدي اشوف حالي ندمت ضيعت ال ٤ شهور قد راسي ، الحمدلله رسبت على العموم وتقبلت الامر ، كان في اختبار رست يعاد للي راسب بماده وحده فقط عدته ورسبت 😊 كنت واثقه انجح لكن ماش كنت داخله ولا عندي لغه ايضاً...

مر بكيت صحت انهزت بس الحمدلله توكلت على الله واستمرريت وعدت الترم فقط بماده عرب الجديده والريديتق، وحمدت اني رسبت ريديتق لان ايضاً ماكان في مجال اتطور بالاجازه اسبوع واحدا! واخاف برضو اخذ زفت بالباقي..

مر الترم بضيق صدر بس مع الاصدقاء قدرنا نتخطى

وظلعت امس النتائج ونجحت فيه وايضاً بالحفه لان الفايصل جلدني جلد، نجحت الحمدلله فيه اخيراً البعض رسب.. والبعض سحب ملفه..



السلام عليكم بنات بتكلم لكم عن تجربتي ب سمتر ون .  
اول شيء لا تسمعون لأحد يقولكم مستواه صعب ومدرسي ايش لان هذا اكثر شي اثر على البنات كانوا خافين مره و متوترين ، بس الحمد لله اختي تدرس معاي في الجامعة وأكبر مني عشان كذا كانت مره مريحتني بكلامها و ما شلت هم ابدأ ابدأ .  
اول ماده بتكلم عنها الريدنق ، ما اقول أصعب ماده بس challenging شوي لان بعض الأسئلة ما تعتمد على المذاكرة ، لكن ما عليكم بتقدرون عليه.  
ثاني مادة الرايثنق ، هذي اكثر ماده كانوا مخوفينا منها طلعت اسهل ماده ، ولا تحسبون ان تهاوشتي مع المس بتتملعن معس لا ، مافي شي اسمه كذا ، انتي بس اتبعي اللي تقوله بالضبط وبتجيبين شي كويس ، بالنسبة لكويزاته مره مره سهله يعني تضمنينها .  
ثالث ماده القرامر ، تعتبر الماده المفضلة لكل الطالبات تقريبا ، حرفيا اللي تذاكرينه يجي وما يجي ابدأ شي من برا انتي افهمي القاعدة و توكلي على الله .  
اخر ماده السبيكنق اند ليسنق ، هذي مادة السوالف تجي المس وتسولف عليكم وعادي ان ما قلتني جملة صحيحة ما فيه محاسبه على الأخطاء اهم شي تشاركين ، وبالنسبة للبريزنتيشن مقدر اقول لا توترون لان اغلب الناس تتوتر لما يكون عندها بريزنتيشن بس ان جهزتي له كويس بإذن الله الكلام بيطلع بدون لا تحسين ، و فيه اختبار سبيكنق يصير بنهاية السمستر ٥ دقائق تتكلمين مع ٢ من المسسز ، هذا كلنا كئنا منخرشين منه ، طلعتنا منه نضحك على السخافه ، سوالف منجد بس هنا يحاسبون على الأخطاء سواء قرامر أو نطق بس بنفس الوقت لا تشيلون همه.  
بالنهاية لا تضغطون على نفسكم كل واحد يعرف ايش قدراته ويعرف المقدار اللي يذاكره ، فإن كنتي تحسبن انس ذاكرتي زين خلاص لا تضغطون على انفسكم ، هذا كان مفتاحي للتعاش مع هذا السمستر ، ان كان مستواس مو مره عالي بالإنجليزي عادي مو معناته ماراح تجيبين درجه كويسه او البنات احسن منس ، ربي ما يحط احد في مكان الا وهو عارف انه راح بيدع فيه ، اللي عليكم المذاكرة والمحاولة و بإذن الله ما يضيع تعبك ، good luck .❤️

اهلاً

بالنسبة للريدينق هو كان اكثر شيء مطفشني فيه هو الباسج ولا الباقي سهل، هو ما كان سهل بس انا عرفت كيف اتدرب له

بالنسبة للفل ان ذا بلانك كنت احط الكلمات اللي باللسهت بجمل من الروابط اللي بقناه الريدينق بعدها اروح احل الورك شيت على ذا التشابتر ورك شيت سمير تحديداً والكريتكال ثنكنق كنت اتدرب له كئيبييرر برضو من سمير

الافكسسز كنت اعرف معنى كل كلمه ف مثال بسيط boring boredom

اللي dom عباره عن ناون ومعناها الطفش

واللي ing معناها شيء يجلب الطفش

ف لازم تعرفون معنى كل كلمه ل اختلاف الاشتقاق

اما القرامر اسمها الصدق اي بلس بالجيب، بس حلوا ورك شيت كثير كثير كئيبييرر لين ما تطفشون وتابعوا مقاطع عن القاعده اللي تاخذونها بيوتيوب عشان تستوعبون اكثر وحلوا الورك بوك ضروري مره

اللسنق اللي فادني له ان اجازتي كلها كانت مسلسلات ف عطاني قدره يعني افهم وش قاعدين يتكلمون عنه بالاختبار

الرايتنق غالباً يعتمد عالمس اللي تدرسك وايش نوع الكتابه اللي تبيها بس كنت اتدرب له بائي نهايه كل اسبوع اكتب برقراف واحد واوريه المس وتصحح لي اغلاطي عشان ما اغلط فيها بالاسايمنت الفعلي

اسمي: هيل ☺، ومستواي باللغة متوسط

### Reading and vocabulary - ENG103

المادة ذي نقدر نقول انها اكثر مادة تمثل تحدي بسمستر ون.

الي عليكم بذوي مادة هو

- حفظ مرادفات الكلمة synonyms

- اشتقاقات الكلمة Affixes

- تدرّبون على التفكير الناقد و القطعة critical thinking and passage

بدايتي مع هذي المادة كانت نوعا ما سيئة خاصة في التفكير الناقد و القطعة.

ماكنت فاهمة كيف استخراج الجواب اقرب مثال ماكنت اعرف الفرق بين لما يسألك inferred و implied

الي هو الاول انت كشخص وش فهمت ؟ و الثاني النص وش يحاول يوصل لك ؟ فكننت دايم احصل جوابين ينفعون و احتار.

و القطعة ماكنت اعرف احلها و هي الي بالأخص تنقصني و اوقات ماكنت افهم القطعة بكبرها و حل هذي

المشكلة انكم لسا عندكم اجازة الصيف تدرّبوا كثير في read works

لأن انا لما عرفت عن الموقع وقت الدراسة ماكان عندي وقت اتدرب عليه او اشوف تطور ملحوظ.

بالنسبة للـ Affixes قبلها رحنت درست ملفات Part of speech الي هو يعلمك متى نحط الفعل متى

الصفة و الحال و هكذا صح ممكن تقولون واضح و مايتحتاج بس برضو شوفوا الملف.

المادة ذي صح سببت لي هم لكن الحمد لله جبت فيها درجة كويسة و على الحافة بسبب القطعة الي انتم ان

شاء الله بتتدربون عليها قبل الدراسة 🙏🏻.

### Grammar - ENG 102

المادة ذي كانت تجربتي معها مرة لطيفة و خفيفة الحمد لله.

الأوقات الي احس مافهمت فيها القاعدة اروح اشوف مقاطع اليوتيوب.

و احل التدريبات الي تنزل لنا و التدريبات الي بكتاب التمارين work book

مادة بإذن الله ماتضيع درجتها من يدكم.

### Writing- ENG101

هذي المادة برضو كانت من الاشياء الصعبة علي.

مشيت فيها لما المس الي تدرسنا تعلمنا عن قاعدة او طريقة كتابة شي نروح نطبق علطول و نوريها و تصحح. ممكن يقابلونكم مدرسين مايهتمون لذي النقطة و فجأة يفاجونكم يلا اكتبوا assignment لذا انصحكم تشوفوا الملف الي راح يرسلونه ملخص لكم قواعد الكتابة و جربوا اكتبوا مع نفسكم و برضوا جربوا اكتبوا assignment مع نفسكم و قيموا نفسكم او تبادلوا مع احد أبدأ لاتغشون او تخلون احد يكتب لكم لان بالفاينل راح تكتبون لحالكم لا قاموس يساعدكم ولا شي.

### Listening- ENG 101

المادة هذي كانت الثقب الاسود حرفياً على ما انها سهلة (٢٠) لكن سمعي ماكان بذاك الزين لذا لجأت للبرودكاست الموجود بالايون كل يوم اسمع مقطع قصير لأي موضوع اشوفه يعجبني و برضوا تطبيق ESL English listening Test ساعدني كثير اسمع المقطع و يسألني عنه و برضوا يعطيني كلمات جديدة استخدموها بالمحادثة و يعلمني وش معناها و يعطيني المحادثة على شكل نص لو ابغا ارجع اقرأها و اسمعها و الحمد لله تطورت كثير و للحين مستمرة صرت اي شي اسمعه بالصدفة ابدأ أقلده و أكرر و اشوف الي سمعته صح ولا لا.

### Arab 101 - العرب and Islm 101 - سلم

مواد بس تحتاج لحفظ و العرب الجزء الأخير شوي فهم. للأمانة ماتعبت فيهم كثير بس اذا كنتم أشخاص تواجهون صعوبة بالحفظ ابدأو ذاكرهم بشكل دوري عشان نهاية السنة تكونوا ملمين فيهم ابد لا تقولوا سهلين و تهملونهم و فالكم +A فيهم يارب ❤️.

ما اذكرك اني سويت شي مرره ملحوظ  
بس الي فرق معاي ، اني قسمت وقتي على كل ماده وركزت في الريدنق اني ما اکتفي بالستات الي معانا  
بس ، كنت اتدرب على مواقع حقت باسچات زي

<http://americanliterature.com/ss/ssindx.html>

وبالنسبه للقرمر كنت اتابع مقاطع شرح للقواعد بالعربي في قناة دروس اونلاين في اليوتيوب بحكم ان  
انقليزيتي في البدايه كانت سيئه جداً وما افهم ايش يقول المستر □□ ، لأن مافيه معلومات كثير والشابتر  
الرايتنق هذي من المواد الي كنت معتبره كلاساتها وقت بريك □ ، كامل يمديك تلخصه بصفحه او صفحتين ف كنت معتمد في مذاكرته على البراكتس الي في الدرايف.  
الاورال سكلز قريبيه جداً من الريدنق الفرق انها اخف و مذاكرتها اسهل ، اذكرك الشئ الوحيد الي كان  
مخوفني في المادة هذي اختبار المقابله الشخصيه واذكر تدربت على توبكس ارسلوها في التلقرام وجت  
منها 🍀 □.

الزبده ابدددداً الترم مو عائق انا دخلت الجامعه وانا ما افرق بين  $y$  و  $u$  والحمدلله عديت الترم بـ معدل جداً  
ممتاز مع ان في شباب توقعوا في البدايه اني ممكن ارسب 😊 ، اهم شي انك ما تقارن درجاتك بـ درجات  
غيرك او وقت مذاكرتك بوقت غيرك لأن مستويات الاشخاص تختلف. حتى لو خبصت بأول كويز او  
بالثاني تذكر ان يمديك تعوض اذكرك في مادة الاورال سكلز اول كويز جبت فيه 2 من 12 والحمدلله تكلمت  
مع المستر و علمني وين المشاكل عندي وايش نقاط ضعفي وجبت فيه المادة +A ف ابدأ لا تستسلمون او  
تخافون من السمستر هذا والله يوفقكم 🍀

اهلاً

بدخل بالعميق على طول .

الحرس = انقلش

انقلش = الحرس

"خلوها ببالكم"

تجربتي مو ناجحة للأسف لأنني ماخذت بالكلام وارتحت سمستر كامل بدون اي جهود معتمده على الي تقدمه الجامعة فقط وهذا اكبر غلط  
الأنقلش ممارسة عندكم سمستر لا تفرطون فيه  
لو عندكم مشاكل نقاط ضعف فيه عالجوها خلال السمستر الأول ، السمستر الثاني غصب تركيزكم ببصير  
على المواد العلمية تحتاج تعطونها من وقتكم .

أنا وكثير انحطينا بموقف جداً سيء كنت اقيس مستواي بناءً على المدرسة ودخلت اختبار تحديد المستوى  
وحليت بالبداية بتركيز ثم اخترت عشوائي بالتالي النتيجة مو صحيحة  
اعرف انكم محترين كيف تحددون مستواكم  
لذلك اختبار تحديد المستوى حقهم الأفضل تحلونه بذمة وضمير عشان تعرفون مستواكم من البداية + قولوا  
لهم يورونكم نتيجة كل قسم بالضبط شوفوا وين نقاط الضعف هل قرامر هل ريدنق عشان التركيز يكون  
مضاعف عليه "فادت كثير"

الأخطاء بدرت مني وللحين اعمل على تصحيحها نصيحة من اعماق القلب تداركوها من البداية .  
لأن الجامعة مستحيل ترجع تعليمها لوراء كل شوي يطالبون بالأفضل وانتم قدها إن شاءالله

هذا موقع حلو وينفع لكل المستويات من الأشياء الي لا زلت استفيد منها:

<http://www.bbc.co.uk/learningenglish/english/features/6-minute-english>

- بدايةً السلام عليكم ورحمة الله وبركاته .. ♥️ أول شي كثير منكم خايف من الانتقال وكيف يطوره وحتى متردد انه يخش هالجامعه او لا ؟ او هل الجامعه هذي مناسبه له أو لا ؟ ..

- في بدايتي بالجامعه كان كل شي ماشي كويس وماكان ذاك الضغط والانتقال كويس لكن شوي شوي حسيت بشوية صعوبه وندمت مره إني ماطورتها لأن لو طورتها كان ضمننت الانتقال كله وبمعدل عالي مره ، لأنني قبل ادخل الجامعه ماخليت احد ماسألته عن الانتقال وكيف ممكن اطورها واسألهم هل ادخل دوره ؟ هل أقرأ روايات واطور نفسي بالقراءه ؟ ولا مايححتاج ؟ .. لكن الله يهديهم كانوا يقولون لي ارتاحي بالاجازه وماله داعي واستانسي ومره ندمت اني سمعت كلامهم ، بالنسبه لي ولتجربتي حسيت الانتقال طيح معدلي شويتين وصدق الحرس اكثر المواد تكون انتقالش فإذا ماتقدرون تضمنونها وتحسون انكم هه و هه مو مره بالانتقال فطوروها قد ماتقدرون على الأقل تضمنون سمستر ون وسمستو تو الانتقال ويبقى السابنس تركزون عليه ومايكون عندكم ذاك الضغط اللي كان فوق ظهري ، واللي مايدري كيف مستواه بالانتقال ومايدري هل بيضمن التخصص او لا ؟ من الحين اقولكم اللي في باله تخصص واحد فقط ومو مستعد يخش تخصص ثاني غيره فالأفضل انه يفكر مره كويس ويشوف الانتقال حقه مش ولا بد يبدأ يطوره قد مايقدر يستغل هالاجازه كويس عشان بالجامعه يرتاح من ناحيه الانتقال ويكون ضامنه ، أما اذا ما عندك لغه وبراسك تخصص معين فيكون افضل لو تدور على جامعه ثانيه تضمن فيها ..

- النقطه الثانيه اللي بتكلم عنها اللي تمنيت اسويها قبل ما اخش جامعه :

١ - اقرأ قصص وروايات وقصص اكسفورد

٢ - ادخل دورات وخصوصًا أكاديميه English place مره مفيده 📌 □

٣- تمنيت اني افكر كثير قبل اختار الجامعه وادور على جامعه اضمن فيها تخصصي.

- وأخيرًا اللي وده فعلاً يعرف مستوى الانتقال حق الجامعه مره مهم انك تشوف الورك شيتس ( اوراق عمل ) واكسرسايزز قبل ماتجزم على الموضوع ويخش الجامعه وبعدها يقيش على نفسه اذا يقدر على هالجامعه او لا .

- لاني قبل اخش الجامعه شفت الورك شيتس حقتهم ومستواها كان جدًا قريب من مستواي لكن لما دخلت الجامعه تغير النظام وكان الليقل مرتفع شوي .. والحمدلله عدت هالسنه على خير ودعواتكم .

اذا حابين تسألون عن أي حاجه بخاطركم ، أو في شي ماغطيته : @rahafHN : telegram

أهلاً وسهلاً فيكم جميعاً

بحكي لكم عن تجربتي في جامعة الحرس ونصائحي للمقبلين على الجامعة ..  
أولاً وأخراً ودائماً! أهم شيء إذا ناوين تدخلونها وربي يسّر لكم ضروري إنكم تكونون متقنين للغة الإنجليزية  
على الأقل ٧٠٪ (ALM) إذا تبغون معدل فوق ٤,٧٥ .. لأن الترم الأول كل مواد إنجليزي وتعتمد على مستوى

لغنتكم .. صحيح بتقولون بنتعلم وبنطور لغتنا .. وأنا معاكم بهالشأن .. لكن اللغة اكتساب وليست حفظ  
كلمات أو قواعد وبس! زيها زي المهارة مع الوقت و الممارسة والتدرب راح تستفيد منها وليس الحفظ ..  
ومهما كان هذه لغة ومستحيل تتعلمها من الألف إلى الياء بشهرين ولا ثلاثة .. و أنا هنا مو أحبب أحد لكن  
ما أبغى أحد يعاني إذا دخل الجامعة ويكتئب ويتحسف ويجب معدل سيء ولا يدخل التخصص الي بيغاه  
بسبب أنه مافكر زين! كثير بنات كانوا مجتهدين وجاييين موزونة ٩٧ لكن معدلاتهم كانت سيئة بسبب اللغة!  
بتقولون لغة لها دخل بمعدلي؟ إي نعم! كثير ناس كانوا متميزين باللغة ومتقنين وجابوا فوق ٤,٧٥ بكل  
أريحية وأنا كنت منهم " يذاكرون لكن لا يفارن جهدهم ولا نتيجتهم باللي أقل منهم " ! لذلك لو كانت لغتك  
" متوسطة" بمعنى كيف؟ أنك تقدر تشوف فلم بدون ترجمة وتستوعب الأحداث و الحوارات وكل شيء " "  
طبعاً أكيد بعض الكلمات بتصير مجهولة بالنسبة لك " هنا أقدر أقولك بتستفيد من الجامعة وراح تقدر  
تطور لغتك وتستفيد من هالتطور! وهنا أقدر أقول ادخل الجامعة بكل أريحية! لكن إذا كان مستواك سيء  
وماتفهم كل شيء فإني أنصحك نصيحة من كل قلبي إنك تتوجه لجامعات أخرى .. زي جامعة الملك سعود  
مثلاً ياخذون للتخصيص ٥٠٪ (ALM) الموزونة و ٥٠٪ (ALM) معدل التحضيري! وبكذا راح تستفيد .. وأدري كثير  
منكم حابّ الجامعة وبيغاهها كدرجة في داخله بس اللغة عامل مهم جداً و راح يدخل حتى بدراسكم بالمواد  
العلمية الترم الثاني فلزام تضعونه بالإعتبار ..

اهلين، انا شهد بما اني انهيت السنة التحضيرية بالحرس بمعدل كويس ( مواد الانقلش سمستر ون كلهم +A وسمستر تو مادتين منهم A والاخيرة +A) اقدر اتكلم عن تجربتي مع الانقلش (تناسب المبتدئين اكثر شيء) بداية الصيفية قبل مايطلع قبولي بالحرس ماكنت اعرف اكتب جملة 😊 حرفياً كنت مريح مع انه ايام الابتدائي كانت انقليزيتي كويسه بس معد مارست الانقلش وكل شيء راح، بالبداية قرأت تجارب الناس وكيف تعلموا الانقلش وايش اللي فادهم حاولت اجمع اكبر قدر من التجارب واشوف ايش اجمعوا عليه اغلب الناس كان وقتها ايام الاختبارات النهائية وكنت متحمسه اني استغل ال ٤ شهور بتطوير الانقلش ، بنهاية عرفت ٣ اشياء مهمة.

١- اذا زاد الشغل على المدخلات كانت المخرجات جداً عجيبة

٢- لاتستعجل على النتائج

٣- القرامر(القواعد) مو مهمة للمبتدئين، مهارة الاستماع اهم شيء.

او ك نتكلم عن المدخلات والمخرجات اول شيء:

المدخلات: هي اللي يسعى لها الشخص ببداية تعلمه لأي لغة مثل ( الاستماع والقراءة)

المخرجات: هي النواتج المدخلات وغالباً يتم تطويرها بعد ما يتم تطوير المدخلات مثل ( التحدث و الكتابة).

اذا استمع الشخص كثير للمقاطع والافلام والمسلسلات او الراديو = راح يقدر يتحدث بطلاقة

اذا قرأ الشخص كتب ( نفس مستواه) راح يقدر يكتب بسلاسة .

\* راح اتكلم شلون طورت الاستماع عندي بالبداية..

حضرت دورة زمان وكانت تقول الشخص اللي يبني يطور الاستماع عنده لازم يستمع شيء مناسب لمستواه مثلاً انتي مريح مره بالانقلش؟ روجي شوفي اطفال الاجانب اللي توهم يتكلمون وش يناظرون مثلاً " دورا "والخ طبعاً بدون ترجممه هذا اهم شيء اكتبني باليوتيوب :

cartoons for 2 years old مااستهبل بديت انا من كراتين طفل عمره ٤ سنوات كنت اططفش وانا

اناظرم بس شسوي عاد ابي اطور الاستماع من الصفر.. تقدرن تشوفون برنامج بارني والاطفال هو

الوحيد اللي تقبلت اناظره بابيتسامه 😊 اللي يقولك شوف مسلسلات مثل friends لغتهم بسيطه صحيح لغتهم

بسيطه وواضحه بس مو لشخص مبتدأ راح يشيل الترجمة منهم ، بالبداية كنت اشوف كراتين لمدة ٢-٣

ساعات ثم اروح اشوف مسلسل لغته بسيطه مع ترجمة واحاول اركز عال كلام كثير طبعاً مرره لغتهم

واضحة وسهلة. مثل:

١- Mind your language

٢- Friends

٣- How I met your mother

وفيه بعد قناة BBC English عاليوتيوب حلوه مره بس بالبداية كنت احط معها الترجمة

طبعاً بالنسبة للكراتين اللي بدون ترجمة لازم تكونين فاهمه ٨٠٪ من اللي يقال و ٢٠٪ زيادة اذا

حسيتي صرتي تفهمين ١٠٠٪ او ٩٠٪ منه غيري مستوى صعوبة الكرتون لو احد اصعب شوي

وهكذا.. بالنسبة للاستماع تطورت بسرعه فيه واكثر مهارة لاحظت تطوري فيها، طبعاً مايمانع افلام

ومقاطع وفلوقات مستوى صعوبتها عالي شوي اهم شيء تركزين عالكلام ووتزيدين من المقاطع اللي مستواها قد مستواك بدون ترجمه.

### الحين بتكلم عن القراءة:

بالبداية ماقدرت اقرأ اي كتاب طبعاً ! لان احتاج ازيد عدد الكلمات عندي قبل اقرأ..  
بديت احفظ كل يوم ١٣ كلمة تقريباً كتابة ونطقاً طبعاً اسوء طريقة هي انك تحفظينهم بدون ماتحطينهم  
بجمل لان بتكون اصعب + مايتعرفين شلون تستخدم لان ساعات ماتنحط الكلمة بأي صياغة. فمثلاً  
تترجمين الكلمة وتحطينها بجملة تسمعين نطقها من موقع موثوق انصح بكتب

### essential words in English 4000

تلقون كل المستويات ٦ موجوده pdf بالنت ومره حلو يعطيك تعريف الكلمة بالانقلش وعليها مثال ثم عليهم  
تدريبات ويحطهم بقصه ويعطيك اسئلة عالقصة واذا تبين تتأكدين من حلك اكتب اسم الكتاب وجنبه AK  
pdf بتلقين الحلول لما تختارين الكتاب شوفي الفهرس ويحيط كل الكلمات اللي بتدرسينها اختاري كتاب  
مناسب لمستواك، بالبداية مايمانع تترجمين الكلمات لان شيء طبيعي بس اذا استمر الترجمة وانتي بمستوى  
عالي راح يكون له سليات مثلاً تفكرين بالكلام قبل تقولينه لانك جالسو تحولينه من عربي لانقلش بعقلك.  
قد ماتزيدين الكلمات قد ماتلاحظين الفرق بأنقلزيتك بعد شهر او شهرين على حسب اجتهادك وتطورك  
تقدرين تقرين كتب طبعاً انصح بكتب ( اكسفورد ) هالكتب لها مستويات كثير من starter ثم ١،٢،٣.. الخ  
موجودين بجريير الواحد ب ٣٦ ريال تقريباً وهدى القناه تنزلهم pdf بس مو كل القصص لكن تنزل كل  
المستويات بعدد معين

<https://t.me/OxfordBookworms>

لما ابتديت حسيت ليفل ١ يناسبني لان شفت ليفل starter مره مبتدئ طبعاً ماتنتقلين من مستوى لآخر الا  
عالاقل قريني ٧-٨ كتب من المستوى السابق.. ايش فايده هالكتب؟؟ كل مستوى لها قرامر معين مثلاً  
مايخليك تنتقلين من مستوى ١ الى ٢ الا وانتي عارفة قاعدة الماضي البسيط وبنهاية كل كتاب موجود  
المفردات الجديدة اللي تعلمتها وغالباً تكون هالمفردات صدق اللي وقفني عندها وماعرفتي معناها.  
من المستوى ٥ او ٦ اظن يمديك تقرئين اي كتاب بالانقلش.  
وبكذا يكون خلصنا المدخلات.. راح اتكلم عن المخرجات اللحين:

### بالنسبة لسبيكنق(التحدث):

بعد شهرين اظن من حفظ الكلمات والاستماع صرت اقدر اشبك كم جملة وافهم الشخص اللي قدامي  
اشتركت (بكامبلي) تطبيق يسمح لك بالتواصل مع معلمين لغتهم الام الانجليزية فادني مرررره مره  
خصوصاً انهم يراعون انك مبتدئة بالانقلش وبعد اذا ما فهمتي شيء يقدرين يكتبونه لك ويترجم لانقلش .  
عموماً تجربة مفيدة للمبتدئين بس للناس المتقدمة تقدر تشوف برنامج (Wakie) حالياً استعمله انا ، تقدرين  
تتواصلين مع اي شخص من الخارج مكالمات وورسائل او نقاش عن موضوع مع عدة اشخاص طبعاً ناس  
مو متخصصين بالانقلش ناس نفسك بيون يمارسون اللغة او بس يسولفون ميزة هالبرنامج تقدرين تسوين  
حظر لكل المدن العربية عشان اللي يطلع لك بالتايم لاين يكونون اجانب..

فيه طريقة اخرى تطورين فيه مهارة التحدث وهي تقحين الكاميرا وتسولفين مع نفسك 😊 اكثر طريقة احبها مره لان احب اسولف انا على راحتي بدون ما احد يحكم على لغتي او اغلاطي واذا طفشت مافيه موضوع اتكلم فيه اكتب بالنت Questions to ask واسأل نفسي واجاب.

طبعاً مهارة السببكتق تجي بعد ماتطورين الاستماع وتزيدين محصول الكلمات عندك.

**آخر مهارة هي الكتابة:** اقدر اقول انه هذي المهارة تجي في اخر الاولويات لعدة اسباب:

اولاً المهارة هذي تتطور بعد تطوير القراءة

ثانياً الكتابة اقل اهمية في تعلم الانجليزية يعني مثلاً اذا ماتعرفين تكتبين انقلش مو معناته ماتعرفين تتكلمين انقلش او تفهمين الشخص اللي قدامك.

بخصوص تطوير هالمهارة لازم يكون عندك محصول كافي من الكلمات ثاني شيء لازم تتعلمين القواعد الاساسية في الانقلش مثلاً جميع الازمان + حروف الجر والخ.

ثالث شيء لازم تكتبين كثير مثلاً تتواصلين مع اشخاص كتابةً تقدرين تسوين لك حساب بالتويتير كله انقلش ترددين ع مقاطع الاجانب وتغريداتهم او تدخلين برنامج ( Hellotalk ) وتسولفين مع ناس لغتهم الام الانجليزية او حابين يمارسون الانقلش مثلك. فيه بعد طريقة لتطويرها واللي هي نهاية كل يوم تكتبين وش صار لك اليوم وايش بتسوين بكره والخ. او حتى مثلاً تقرين اي مجله او كتاب ثم تلخصينه.

---

**حابه اقول كم نصيحة بخصوص الاشياء اللي بتفيدك بالحرس :**

١- موقع readtheory تدرين فيه على قراءة القطع ثم يعطيك اسئلة تجاوبين عليها واذا غلطتي يشرح لك ليه الاجابه a مثلاً تعتبر هي الصحيحة + فيه مستويات ويسوي لك اختبار تحديد مستوى قبل مايعطيك مستوى معين واذا نجحتي في عدة قطع لمستوى معين ينقلك لمستوى اعلى.

٢- موقع ESL للاستماع مرره حلو يعطيك تسجيل صوتي تسمعيه وتجاوبين على عدة اسئلة فيه مستويات ومره بطل اذكر اني ختمته كله بصيفيه، وتفاجأت انه اغلب اختبار اتنا الاستماع كانت منه ببداية السمستر، ايضاً موقع British Council learn English فيه استماع بالاكسنت البريطاني طبعاً كنت انزل بالدرجات اذا كان التسجيل الصوتي بالاختبار اكسنت بريطاني □□♀ حلو تدرين على اكثر من اكسنت.

--

**بحط لكم قناة باليوتيوب وكم تطبيق او موقع فادوني بعدة اشياء:**

١- تطبيق Englishcentral يعطيك مقاطع متنوعة بمختلف المجالات وتسمعين المقطع والكلام مكتوب اسفل المقطع واذا ماعرفتي كلمه تحددنيها يترجمها لك بأي لغة مثلاً العربية او تبين انقلش تعريف لها او مثلاً امثله عليها وتقدرين تحطين الكلمه ضمن اللسته اللي فيها كلمات جديدة عليك وكل يوم تراجعينها ويحط عليها براكتسز مثلاً تدريب املاء عالكلمة او نطق والخ.

٢- ZAmerican English هذي قناة باليوتيوب لمعلم مصري طبعاً اللي جذبني لها هو الاكسنت تبع

المعلم 😊❤️ اكسنت امريكي مضبووط ومسوي كورسات مجاناً وفيه مقطع يشرح كيفية اتباع كورساته طبعاً كورسات كاملة من إلى وعنده تطبيق وكل شيء موضحة بقناته مرره بطل خصوصاً بالقواعد يبسطها لك جداً ، مفيد لكل شخص ضايح مو عارف من وين بيتدي..

٣- موقع youglish تحطين اي كلمه تبينها وتحددن وش الاكسنت اللي تبينه ويطلع لك كل شخص نطق هالكلمة باليوتيوب عشان تعرفين النطق الصحيح لها واستعمالاتها.

وبكذا قلت كل اللي عندي موفقين يارب والله يكتب لكم كل اللي فيه الخير وتذكروا دائماً: الإنسان يحصد ما يزرعه 

وبكذا وبعد ما قرئتم التجارب والنصائح، جاء دوركم في انكم تحددون هل الجامعة تناسبكم؟ وهل انتوا راح تستفيدون من نصائحنا وتتجنبون الاخطاء اللي ارتكبناها؟

الله يوفقكم ويكتب لكم اللي فيه الخير 